

**Govor predsjedavajućeg Doma naroda Parlamentarne skupštine Bosne i Hercegovine Bakira Izetbegovića na Četvrtom sastanku predsjednika parlamenata euroazijskih zemalja "Velika euroazija: Dijalog. Povjerenje. Partnerstvo"**

**Nur Sultan, 24. septembar 2019.**

"Poštovani predsjedniče Medžlisa Parlamenta Kazahstana, gospodine Nigmatulin, Poštovane kolege predsjednici i članovi parlamenata, Cijenjene dame i gospodo,

Čast i zadovoljstvo mi je obratiti se danas na Četvrtom sastanku predsjednika parlamenata euroazijskih zemalja. Koristim priliku da se zahvalim na pozivu i da domaćinima čestitam na odličnoj organizaciji ovog važnog skupa.

Prije dvije godine sam kao član Predsjedništva BiH imao priliku posjetiti Kazahstan i zaista sam oduševljen njegovom ljepotom i gostoprimstvom njegovih ljudi. Naši prijateljski odnosi su se počeli razvijati već od davne 1992. godine kada je Kazahstan među prvim zemljama svijeta priznao Bosnu i Hercegovinu.

Susreti poput ovog imaju poseban značaj, jer su oni dobra platforma i mogućnost da se razmijene informacije i stvori neophodno povjerenje koje treba rezultirati partnerstvom, a sve to na koncu u korist i za dobrobit građana koji žive u našim zemljama. Ovo nije tek puka teza, jer moja zemlja Bosna i Hercegovina koju ovdje kao predsjedavajući Doma naroda Parlamentarne skupštine predstavljam ima bogato višestoljetno iskustvo dijaloga i stvaranja povjerenja među različitim etničkim i religijskim skupinama.

Bosna i Hercegovina je demokratska zemlja koju zbog njene kulturološke i religijske isprepletenosti, te geografskog položaja i historijskog naslijeđa opravdano smatraju mostom između Istoka i Zapada, a njen glavni grad Sarajevo, u kojem u neposrednoj udaljenosti od par stotina metara možete vidjeti i moliti se i u pravoslavnoj i u katoličkoj crkvi, u sinagogi i u džamiji, nazivaju „Jerusalemom Evrope“. To je zemlja sa izuzetno

obrazovanim ljudima i radnom snagom, značajnim prirodnim resursima i mogućnostima za ulaganje u energetska, metalna, prehrambena i namjenska industrija. Sa svojim geografskim položajem u blizini tržišta EU, a kao potencijalni kandidat za članstvo u EU, BiH pruža odlične mogućnosti za razvoj ekonomske saradnje.

Bosna i Hercegovina je u proteklom periodu, posebno u posljednje četiri godine, ostvarila napredak u mnogim oblastima. Reformska agenda koja je usvojena u julu 2015. ostvarila je impozantne rezultate. Usvojeni zakonski i podzakonski akti omogućili su najznačajniji ekonomski rast i razvoj u postdejtonskom periodu. Industrijska proizvodnja je rasla preko 4% godišnje, prerađivačka industrija preko 6%. Izvoz je rastao dvocifrenim procentima, u četiri godine ukupno 39%, najbrže je rastao turizam, skoro se udvostručio u četiri godine. Nominalni BDP je rastao prosječno 3% godišnje. Broj zaposlenih je porastao za 14% u protekle četiri godine.

Obim vanjskotrgovinske razmjene prešao je 30 milijardi KM. Veliki pomaci u trgovini ostvareni su posljednjih godina u trgovini sa Republikom Turskom, te očekujemo da će obim razmjene najvjerojatnije ovoj godini dostići ciljanih milijardu dolara. Sa Ruskom Federacijom također bilježimo znatne pomake, posebno u izvozu hrane na rusko tržište. Ono što posebno ide u prilog napretku na ekonomskom planu jeste i činjenica da se oko 70% naših proizvoda izvozi u Evropsku uniju sa kojom imamo veoma povoljne bescarinske aranžmane. Saradnja firmi iz euroazijskih zemalja sa BiH firmama kroz Joint-Venture projekte pruža i njima iste pogodnosti.

Pored napretka u oblasti ekonomije, Bosna i Hercegovina se u proteklom periodu značajno približila svom glavnom vanjskopolitičkom cilju – članstvu u Evropskoj uniji. Stupio je na snagu Sporazum o stabilizaciji i pridruživanju s EU i predali smo Aplikaciju za članstvo u EU. Nakon uspješno odgovorenog seta od skoro 4.000 pitanja dobili smo Mišljenje Evropske komisije koje sadrži niz preporuka čije ispunjenje nam daje realnu šansu da uskoro dobijemo status kandidata za članstvo u Evropskoj uniji.

Dakle - pravi je čas za intenziviranje saradnje i investiranje u Bosni i Hercegovini.

Obostrano korisnu saradnju možemo ostvariti samo ako razgovaramo jedni s drugima, ako se međusobno uvažavamo i ako povrh svega osiguramo političku stabilnost uz maksimalno poštivanje principa pravne države i vladavine zakona. Na nama kao parlamentarcima i političkim predstavnicima naših naroda i zemalja leži odgovornost da u svojim zemljama obezbjedimo prosperitet i napredak za sve naše građane, a onda i da se međusobno zalažemo za iste ciljeve na globalnoj agendi.

Tako će nam biti lakše da realizujemo Program održivog razvoja 2030 sa svojih 17 Globalnih ciljeva usvojenih na Samitu UN-a 2015. godine, što nam je nesumnjivo jedan od zajedničkih prioriteta. U tom smislu je važno podsjetiti da prostor Euroazije pokriva oko 65% svjetskog stanovništva, 75% izvora energije, i 40 % svjetskog GDP-a, te bi dalje unaprijeđenje posebno ekonomske saradnje imalo pozitivne efekte kako za naše pojedinačne zemlje, tako i na čitav euroazijski prostor.

Samo uz pojačanu međusobnu interakciju možemo bolje razumjeti jedni druge, uskladiti naše zajedničke ciljeve i izgraditi korisne međuparlamentarne veze i partnerstva. Izgraditi Veliku Euroaziju.

Neka ovaj forum na koji se odazvalo više od 50 zemalja i 16 međunarodnih i međuparlamentarnih organizacija bude dokaz da to i želimo i možemo.

Hvala na pažnji!"